

## KENYATAAN MEDIA

### **MyCC TERIMA AKU JANJI DARIPADA PERSATUAN PEMANDU-PEMANDU PELANCONG SABAH (STGA)**

**KUALA LUMPUR, 3 SEPTEMBER 2019** - Suruhanjaya Persaingan Malaysia (MyCC) telah menerima aku janji daripada Persatuan Pemandu-Pemandu Pelancong Sabah (STGA) yang mewakili kesemua 477 ahlinya berhubung isu persaingan melibatkan penetapan yuran pemandu pelancong oleh STGA.

Mengikut aku janji ini, kesemua ahli STGA telah berjanji untuk membatalkan Yuran Profesional Minima Pemandu Pelancong (*Minimum Tourist Guides Professional Fees*) bertarikh 1 Mac 2009. Mereka juga telah berjanji tidak akan mengadakan sebarang perbincangan mengenai yuran pemandu pelancong pada masa hadapan. Pada masa yang sama, kesemua ahli telah berjanji untuk menghentikan pelaksanaan Kadar Bayaran mengikut Panduan Yuran Profesional STGA yang dibincangkan pada Mesyuarat Agung Luar Biasa STGA pada 20 April 2017. STGA juga dalam aku janjinya akan mengingatkan semua ahlinya untuk mematuhi Akta Persaingan 2010 dengan sepenuhnya dan tidak akan teragak-agak untuk memberi kerjasama penuh kepada MyCC sekiranya terdapat sebarang aduan dibuat berkenaan ahlinya pada masa hadapan.

“MyCC telah memuktamadkan kes ini dengan jayanya di mana ianya bakal memberi manfaat kepada pengguna dan industri pelancongan di Sabah. Sebarang perlakuan penetapan harga adalah dilarang sama sekali di bawah Akta Persaingan 2010 kerana ia menghalang tahap kecekapan, inovasi dan keusahawanan dalam industri dan akan menyebabkan pengguna tidak dapat menikmati perkhidmatan berkualiti, harga dan pilihan yang kompetitif. MyCC tidak teragak-agak untuk mengambil tindakan tegas ke atas mana-mana perlakuan anti-persaingan demi melindungi kepentingan pengguna Malaysia. Orang awam digalakkan untuk tampil memberi maklumat berkaitan sebarang potensi kewujudan amalan-amalan anti-persaingan,” menurut Encik Iskandar, Ketua Pegawai Eksekutif MyCC berhubung perkara ini.

**UNTUK SIARAN SEGERA  
MEJA BERITA/EKONOMI**

---



**SURUHANJAYA PERSAINGAN MALAYSIA  
MALAYSIA COMPETITION COMMISSION**

Aku janji ini boleh diakses oleh orang awam melalui laman sesawang MyCC di [www.mycc.gov.my](http://www.mycc.gov.my). Aku janji STGA turut dilampirkan di sini sebagai Lampiran A.

--tamat—

**Untuk pertanyaan media, sila hubungi:**

Noor Khalijah Mazlan, Tel +603 2273 2277 (ext 702), Email: [khalijah@mycc.gov.my](mailto:khalijah@mycc.gov.my) Bahagian

**Komunikasi dan Advokasi Suruhanjaya  
Persaingan Malaysia**

**Mengenai Suruhanjaya Persaingan Malaysia (MyCC)**

Ditubuhkan pada Jun 2011, MyCC ialah satu badan bebas bertanggungjawab untuk menguatkuasakan Akta Persaingan 2010, yang dilaksanakan untuk menggalakkan persaingan sihat yang seterusnya akan merangsang produktiviti dan inovasi, lantas mewujudkan pilihan produk atau servis yang lebih banyak kepada pengguna dan kualiti yang lebih baik pada harga yang kompetitif.

Akta ini digunapakai untuk semua aktiviti komersil yang dijalankan di dalam dan di luar Malaysia yang boleh menjejaskan persaingan di pasaran Malaysia. Ia memberikan satu rangka kerja kawal termasuk kuasa menyiasat, menghakimi dan mengenakan penalti-penalti kepada pesalah undang-undang persaingan.

Untuk maklumat lanjut tentang Akta dan MyCC, sila rujuk laman web [www.mycc.gov.my](http://www.mycc.gov.my). Butiran Seksyen 43 daripada Akta: Kuasa untuk menerima Aku janji

**Nota Pengarang:**

1. Akta Persaingan 2010 membenarkan satu perusahaan membuat Aku Janji mengikat secara sah tanpa keperluan untuk mencari sebarang pelanggaran oleh MyCC. MyCC mempunyai budi bicara sama ada untuk menerima Aku Janji tersebut dan akan mengambil beberapa faktor bagi pertimbangan sebagai penentu penerimaan Aku Janji tersebut.
2. Faktor-faktor ini termasuk, tetapi tidak dibataskan oleh, tahap pelanggaran; tahap kerjasama yang diterima daripada perusahaan dalam membantu MyCC dengan siasatannya dan sama ada menerima Aku Janji akan dengan efektifnya dapat menangani dengan berkesan isu persaingan. Kuasa Suruhanjaya menerima Aku Janji dinyatakan dalam seksyen 43 dalam Akta, seperti berikut:

*43. (1) Suruhanjaya boleh, tertakluk kepada syarat-syarat yang boleh dikenakan oleh Suruhanjaya, menerima daripada suatu perusahaan suatu aku janji untuk membuat atau menahan diri daripada membuat apa-apa jua yang difikirkan sesuai oleh Suruhanjaya.*

*(2) Jika Suruhanjaya menerima aku janji di bawah subseksyen (1), Suruhanjaya hendaklah, berhubung dengan suatu pelanggaran, menutup penyiasatan itu tanpa membuat apa-apa dapatan pelanggaran dan tidak boleh mengenakan suatu penalti ke atas perusahaan itu.*

*(3) Mana-mana aku janji yang diterima oleh Suruhanjaya di bawah seksyen ini ialah suatu dokumen yang tersedia untuk diperiksa oleh orang awam mengikut cara yang ditentukan oleh Suruhanjaya.*

*(4) Peruntukan mana-mana aku janji yang diterima oleh Suruhanjaya di bawah seksyen ini hendaklah boleh dikuatkuasakan oleh Suruhanjaya seolah-olah peruntukan itu telah dinyatakan dalam suatu keputusan yang diberikan kepada perusahaan yang memberikan aku janji itu menurut seksyen 40.*

3. Perjanjian mendatar dan menegak yang dilarang:

(1) Suatu perjanjian mendatar atau menegak antara perusahaan dilarang setakat yang perjanjian itu mempunyai matlamat atau kesan menghalang, menyekat atau mengganggu persaingan secara signifikan dalam apa-apa pasaran bagi barangan atau perkhidmatan.

(2) Tanpa menjejaskan keluasan subseksyen (1), suatu perjanjian mendatar antara perusahaan yang mempunyai matlamat untuk:

- (a) menetapkan, secara langsung atau tidak langsung, suatu harga belian atau jualan atau apa-apa syarat perdagangan yang lain;
- (b) berkongsi pasaran atau punca berkaitan;
- (c) membataskan atau mengawal;
  - (i) pengeluaran;
  - (ii) saluran keluar pasaran atau capaian pasaran;
  - (iii) pembangunan teknikal atau teknologi; atau
  - (iv) pelaburan; atau
- (d) melakukan tipuan bida, disifatkan mempunyai matlamat atau kesan menghalang, menyekat atau mengganggu persaingan secara signifikan dalam apa-apa pasaran bagi barangan atau perkhidmatan.

(3) Mana-mana perusahaan yang merupakan suatu pihak kepada suatu perjanjian yang dilarang di bawah seksyen ini adalah bertanggung bagi pelanggaran larangan itu.